

DOMINGU XXIII TEMPU KOMÚN – TINAN C

Tema

Liturjia domingu ne'e nian konvida ita atu foti konxiénsia kona-ba oinsá ezijente dalan “Reinu” nian. Hili “Reinu” la'ós dalan ida fasilidade nian, maibé aseita la'o tuir dalan hakribi-an no saran moris nian.

Evanjellu mak hatudu katak dalan Reinu nian tenke iha fatin dahuluk liu fali ema sira ne'ebé ita hadomi, ita-nia rikusoin sira, ita-nia interese sira no eskema pesoál. Se karik simu proposta ne'e, ita tenke hanoin sériu se simu ga lae, se iha kbiit atu simu... Jezús la admite fó sorin-sorin: se aseita “Reinu” tenke lori to'o rohan no tempu tomak, se lae lalika hahú buat ruma ne'ebé ikusmai la lori to'o rohan.

Leitura dahuluk fó hanoin ba ema hotu ne'ebé la konsege deside ba “Reinu” katak iha Maromak de'it mak bele hetan ksolok loos no sentidu moris nian. Nune'e, enkorajamentu implísitu mak adere ba “Reinu”: maski ezijente, ne'e mak dalan ne'ebé lori ba ksolok nakonu.

Leitura daruak fó hanoin katak domin mak valór fundamentál, ba sira hotu ne'ebé aseita dinámika “Reinu” nian; nia de'it mak halo deskobre igualdade ema hotu nian, tanba ema hotu nia Aman ida de'it no sai maun-alin iha Kristu. Aseita moris tuir lójika Reinu nian signifika rekoñese iha ema ida-idak maluk ida no moris konsekuénsia sai maun-alin ba malu.

LEITURA I – Sab 9,13-19

Livru Sabedoria nian mak testu ida ho karakter sapiensiál, katak tatoli “sabedouria”, nu'udar arte moris di'ak, hetan susesu no haksolok. Autór mak “liurai” ida, ne'ebé hado,i sabedouria no harii templu iha “foho santu” no altár ida iha “sidade Maromak nia horik-fatin” (Sab 9,6-8). Maski livru hatudu katak autór mak liurai Salomão, maibé ida-ne'e mak livru ida hakerek liutiha Salomão nia tempu (livru husi sékulu I mK, Salomão sékulu X mK), ne'ebé judeu loos ida karik husi comunidade Alexandria mak hakerek. Livru iha objetivu rua: ida dirije ba kompatriota sira ne'ebé hela iha paganizmu, idolatria no imoralidade nia leet, no hatudu ba sira vantejen atu persevera iha fiar no moris iha justisa; objetivu seluk dirije ba pagaun sira no apresenta ba sira superioridade fiar no valór sira israelita nian. Autór esprime tuir mundu elenizmu nia hanoin, hodi esforsa atu esprime fiar no konviksaun sira iha linguajen atualizada, tuir gostu kultura grega tempu ne'ebá nian.

Testu ne'ebé apresenta mai ita mak finál parte daruak livru nian (kf. Sab 6,1-9,18). Iha ne'ebá, autór tau iha liurai ida niaibun (Salomão, maski la refere ho modu esplísitu) elojjiu “sabedouria” nian.

MENSAJEN

Kestaun fundamentál ba autór testu nian mak ida-ne'e: sabedouria ne'ebé don husi Maromak de'it mak bele halo ema komprende buat hotu, halo buat ne'ebé Maromak gosta no hetan makso'in.

Autór hahú husi konstataun kona-ba ita-nia moris nia frajilidade, limitasaun sira, difikuldade típika ema nian, atu foti konkluzsaun katak: hodi kbiit rasik ita la bele komprende

sasán sira, la bele deskobre sentidu loos ita-nia moris nian, la bele komprende valór sira ne'ebé lori iha dalan moris no ksolok nian. Nune'e, oinsá “koñese Maromak nia hanoín sira?” Autór hetan de'it resposta ida: ema tenke simu “sabedouria”, Maromak nia don haraik ba sira hotu ne'ebé iha interese atu fó sentidu loos ba moris. Maromak nia hahalok de'it mak haraik ba ema sira “sabedouria” ne'ebé permite atu hetan sentidu moris nian no dixerne lialoos husi liafalsu, importante husi inútil.

LEITURA II – Flm 9b-10.12-17

Surat ba Filémon mak Paulo nia surat ne'ebé badak liu no pesoál. Nia hakerek ba ema ida naran Filémon karik membru importante ida Kreda Kolossos nian.

Husi surat nia konteúdu ita bele haree sirkunstánsia sira atu hakerek testu ne'e. Onésimo, Filémon nia atan, halai husi nia patraun nia uma. Nia hasoru Paulo, kesi an ba nia no sai sarani. Paulo, ne'ebé altura ne'ebá iha kadeia (Éfeso? Roma?), halo nia sai kolaboradór no husik Onésimo hamutuk ho nia. Situasaun bele sai aat se Filémon sente Paulo ofende nia; Husi pontudevista legál, Paulo halo infrasaun hasoru direitu privadu se nia fó protesauun ba atan ne'ebé halai. Onésimo iha risku atu ema dadur nia, haruka fali ba nia patraun no simu kastigu todan.

Iha kontestu ida-ne'e mak Paulo rezolve haruka Onésimo ba Filémon. Onésimo lori ho nia surat ida, iha ne'ebé Paulo esplika ba Filémon situasaun no intersede ba atan ne'ebé halai. Ho delikadeza boot, Paulo dehan ba Filémon katak, se bele haruka fali Onésimo ba nia, tanba nia sai tulun boot; maski nune'e, Paulo husu, sujere, maibé la impoin no husik desizaun iha Filémon nia liamn.

Surat ne'e testu ida furak liu, nakonu ho sentimentu sira, “obra-prima loos ida sentimentu no fuan nian”.

MENSAJEN

Importante iha testu ida-ne'e liufali problema privadu ida, mak problema ekleziál (ho implikasaun sosiál), no presiza rezolve liuhusi valór aas liu étika sarani, katak domin.

Ba Paulo, domin tenke sai norma aas liu no troka-laek ne'ebé dirije no kondisiona liafuan sira, hahalok sira, desizaun sira ema fiar-na'in nian. Domin iha konsekuénsia prátika, ne'ebé membru sira comunidade sarani nian la bele haluha: implika haree iha ema ida-idak maluk ida – independentemente husi nia rasa, kór, eh ninia estatutu sosiál. Haree husi perspetiva ida-ne'e, ita keta hakfodak se Paulo husu Filémon atu simu Onésimo la'ós ona nu'udar uluk (atan), maibé nu'udar agora – maluk ida iha Kristu. Se Filémon ema sarani duni, ida-ne'e mak atitude ne'ebé nia tenke asume hasoru Onésimo.

Problema eskravatura nian, mak problema ida comunidade ekleziál enfrenta. Maibé sarani sira komprende kedas katak solusaun la'ós iha violénsia eh revolta, maibé hodi lori to'o rohan konsekuénsia sira fraternidade nian ne'ebé halo ema hotu sai ida no rezulta iha faktu nu'udar “Maromak oan sira”. Violénsia, bainhira maka'as, hamosu de'it atan seluk atu troka sira uluk nian, hodi la muda situasaun; domin de'it mak bele muda ema nia fuan, hodi hakotu esplorasauun ema nian husi ema seluk. Konversaun ba domin – ezijénsia fundamentál atu integra iha comunidade ekleziál – ezije rekoñesimentu kona-ba igualdade fundamentál ema sira nian (“lahó distinsaun entre ema judeu eh gregu, entre atan eh ema livre, entre mane eh fetu, tanba hotu-hotu sai ida de'it iha Kristu Jezús”, Paulo hateten – Gal 3,28). Hahú husi domin, “don” atan nian ne'ebé deskobre igualdade kle'an ema hotu nian, Maromak ida de'it nia oan sira no maun-alin iha Kristu; hahú husi domin, atan deskobre afirmasaun momoos

kona-ba ninia dignidade nu'udar ema. Ne'e mak kestaun fundamentál ne'ebé testu apresenta mai ita.

EVANJELLU – Lc 14,25-33

Ita sei iha “dalan ba Jerusalém”. Hanorin ohin nian dirije ba “ema lubun boot”, katak ba Jezús nia eskolante hotu ohin no abanbainrua nian.

Ai-kanoik ida molok (kf. Lc 14,15-24) sujere katak “festa han-hemu Reinu nian” nakloke ba ema hotu ne'ebé aseita Jezús nia konvite, inklu ema kiak sira, paralítiku sira, matan-delek sira no ain-kude'ik sira... Oras-ne'e, Lucas apresenta ezijénsia ruma ne'ebé ema hotu ne'ebé tama iha “festa Reinu nian” tenke kumpre. Jezús nia hanorin sira kona-ba kondisaun dixipuladu nian no nia tema ne'ebé domina mak hakribi an rasik.

MENSAJEN

Evanjellu ohin apresenta ezijénsia tolu atu tama iha festa “Reinu” nian, no sira hotu tama iha tema hakribi-an nia laran.

Ezijénsia uluk mak prefere Jezús liufali família rasik (vers. 26). Lucas tau iha Jezús nia ibun espresaun ida forte liu. Verbu “misséô” ne'ebé uza iha ne'e tradús literalmente signifika “rai kunan”/odeia (“sé mak la hakribi nia aman, inan... labele sai ha'u-nia eskolante”). Atu sai eskolante, tenke rai kunan ba ema ruma? Lae. Ne'e maneira orientál atu ko'alia, “hakribi” (odeia) signifika “tau iha fatin daruak buat ruma, tanba, iha ita-nia moris mosu valór ida importante liután”. Jezús la husu atu ita iha ódiu ba ema ruma, liután sira ne'ebé ita iha ligasaun domin nian... Nia ezije atu relasaun familiár sira la impede atu adere ba “Reinu”. Se presiza hili, prioridade tenke fó ba “Reinu”.

Ezijénsia daruak mak hakribi moris rasik (vers. 27). Jezús nia eskolante labele moris atu halo opsaun egoísta, hodi tau iha fatin dahuluk ninia interese sira, eskema sira, buat ne'ebé di'ak liu ba nia an rasik; maibé tenke koloka nia moris atu serví “Reinu” no halo nia moris sai don ida domin nian ba maluk sira, se presiza to'o mate. Ida-ne'e mak loos duni, Jezús nia dalan; eskolante simu konvite atu imita niania.

Ezijénsia datoluk mak hakribi rikusoin sira (vers. 33). Jezús hatene katak rikusoin sira fasil liu atu nakfilak ba maromak sira, sai prioridade ida, halo ema sai atan no lori nia atu moris ba sasán sira ne'e; halo nune'e ita la fó espasu ba “Reinu”. Husi parte seluk, fó prioridade ba rikusoin sira signifika moris ho forma egoísta, hodi haluha maun-alin sira nia nesesidade; moris iha dinámika “Reinu” nian implika moris iha domin no husik atu lójika domin no partilla nian mak dirije ita.

Ezijénsia sira-ne'e hatudu momoos katak, opsaun ba “Reinu” la'ós dalan ida fasilidade nian no, la'ós dalan ida ne'ebé ema hotu aseita atu tuir. Tanba ne'e mak Jezús rekomenda atu tetu didi'ak implikasaun no konsekuénsia sira opsaun “Reinu” nian. Ai-kanoik kona-ba ema ne'ebé molok harii torre ida tenke hanoin se nia iha kbiit atu remata (vers. 28-30) no ai-kanoik liurai ida ne'ebé, molok ba funu, hanoin uluk se bele ba kontra liurai seluk ho kbiit boot liu (vers. 31-32) konvida kandidatu sira ne'ebé hakarak sai Jezús nia eskolante atu foti konxiénsia kona-ba kbiit rasik, kona-ba vontade rasik, desizaun rasik atu korreponde ba dezafiu sira Evanjellu nian hodi asume, ho radikalidade, ezijénsia sira “Reinu” nian.